

Suliniut MANU-p ineriartorteqqinneratut isigineqarsinnaasumik nuna tamakkerlugu angajoqqaanut atuarfimmik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Angajoqqaanut atuarfik aallartinneqassaaq 1. juuli 2018-mi.

(Inatsisartunut ilaasortaq Nivi Olsen, Demokraatit)

Akissuteqaat

(Peqqissutsimut Naalakkersuisoq, Agathe Fontain)

Siullermeerneqarnera

Inatsisartunut ilaasortaq Nivi Olsen aalajangiiffigisassatut siunnersuuteqarmat qutsavigaara. Meeqqatta taakkualu ineriartornerat soorunami nunatsinni pingaarnarpaat ilagaat. Siunnersuutit suulluunniit meeqqat pitsaasumik inuttaaqataalernissaannut pitsaanerpaamik periarfissiisinnaasut pillugit oqallitsisisinnaasut iluarisajaajuannarput.

Meeqqat kusanartumik iluamilu innuttaaqataasussanngorlutik ineriartornissaat suli inunngunnginneranniilli aallartereertarpoq, ukiorpassuarnilu ineriartorneq tamanna ingerlaannartarpoq. Angajoqqaat tamarmik meeqqatik pitsaanerpaamik kissaattarpaat, angajoqqaalli ilaat angajoqqaajulluarnissaminnut sakkussaminnik amigaateqartarput. Tassalu sakkussat taakku angajoqqaanngornissamut piareersarnermut suliniummi MANU-mi tunniunniarneqartarput.

Nuna tamakkerlugu pilersaarutip MANU-p angajoqqaanut naartuleqqaarnermiit meeqqap qulingiluanik qaammateqalernissaata tungaanut pikkorissartitsinerit neqeroorutigisarpai. Siunertaavoq Innuttaasut peqqissussaat pillugu 2014-imi misissuinermi susassaqarfimmi pineqartumi unamminiarnartut paasineqartut tunngavigalugit ilaqutariinnik meerartalinnik nukittorsaanissaq. Unamminiarnartut tassaasinnaapput atornerluineq, sumiginnaaneq ilaqutariillu akornanni akerleriinnerit il.il.

Ileqqorlunneq inoqatinullu ataqqinninnginneq meeraanermi isumassorneqarsimannginnerup toqqissisimannginnerullu kingunerisinnaavai. Angajoqqaat pitsaasumik meeqqaminnik perorsaanissaannut sakkussanik tunigutsigit taava inersimasut ataqqinnittut ingerlalluartullu pilersissavavut.

MANU ingerlanneqarpoq Peqqissutsimut Pitsaaliuinernullu Aqutsisoqarfiup ataaniittumit immikkoortortamit Meerartaarnissamut Piareersarnermit. Maannakkorpiaq MANU taamaallaat angajoqqaanut qaammatit qulingiluat tikillugit utoqqaassusilinnik meerartalinnut neqeroorutaavoq. Siunissaq ungasinnerusoq eqqarsaatigalugu tamanna pitsanngorsarniarlugu anguniagaavoq angajoqqaanut ukioqqortunerulaanik meeralinnut aamma neqeroorutigineqartalernissaa. Meerartaarnissamut Piareersarfimmit maannakkut qanoq iliorluni MANU-mi angajoqqaanut marluk angullugit ukiulinnik meerartalinnut annertusarneqarsinnaanersoq allaaseralugu suliarineqarpoq. Tamanna meeqqap inunngornerminiit ineriartorneranut pingaaruteqaqisumut annertuumik pitsanngorsaataassaaq.

Annertusaanissamik siunnersuut tamanna UKA2017-imi saqqummiunneqarnissaminut piareeqqavoq. Taamanikkussamut Naalakkersuisut tamatuma aningaasaqarnikkut sulisoqarnikkullu atorfiit qanoq annertutigisut pisariaqartinneqartut allaaserineqarnerat saqqummiukkumaarpat.

Utoqqalinersiallit, aalisartut piniartullu pilersaarummut ilaatinneqarsinnaanerat eqqarsaatigalugu Meerartaarnissamut Piareersarfimmit taakkua qaaquneqarnissaannik periarfissaq ammatinneqarpoq, tamanna angajoqqaanit kissaatigineqassappat. Tamannali sulisut ilinniarsimasut ilinniartitsinerisa saniatigut ilassutissaannaassaaq.

Uannut annertuumik pingaaruteqarpoq MANU-p suliniutillu tassunga assingusut ineriartorteqqillugit sulinerup ingerlatiinnarneqarnissaa. MANU-mi nukittoqut tassaavoq kinguaariit tamakkerlugit nukittorsarneqassammata, taamaalillutik angajoqqaanngorniassammata suli pikkorinnerusut isumassuilluarnerusullu. Taamaaliornikkut inersimasut innuttaasut ingerlalluartut pitsaasunillu naleqartitallit pilersissavagut.

Taamaalillutik Naalakkersuisut qanoq iliorluni siunissami MANU annertusarneqarsinnaanersoq allaaseralugu aallartereerpat. Tamanna UKA2017-imi saqqummiunneqarnissaminut piariissaaq. Inatsisartunut ilaasortamit siunnersuutigineqartutut annertusaanermi naatsorsuutigineqarpoq angajoqqaat marluk angullugit ukiulinnik meerartallit peqataasinnaanngornissaat. Maannakkuugallartoq MANU-p annertusarnissaa suli ersarluppoq, matumani aningaasaqarneq, init sulisoqarnikkullu tunngasunik allaaserinnineq qanoq isikkoqassanersoq pineqarluni. Meerartaarnermut Piareersarfimmiilli eqqumaffigineqarpoq sammisat soorlu peqqinnartumik inuuneqarnermut aningaasaqarnermullu tunngasut aamma angajoqqaanngortussat piareersarneqarnerannut ilaanagerat. Aalajangiiffigisassatut siunnersuummi isumassarsiat suliap ingerlateqqinneqarnerani ilanngullugit isumaliutigineqarumaarput.

Taamaattumik siunnersuutip taamatut isikkoqarluni itigartitsissutigineqarnissaa inassutigineqarpoq.